

Prolog Fasnachtsplagggedde 2019

Motto: „Dr Zapfe isch ab“

Es gärt in dä Verein, was isch passiert?
Dr Zapfe isch ab, d'Züandschnuer brennt ungeniert
Dr Hussääge hängt schräg an dr Wand
Die neuu Gebühreornig isch ä Schand
Anstatt d'Verein unterenander z'vernetze
Duet sie dr Gmeinroot in Panik versetze

Me het ä Schuelhus baut für 70 Millione
Dä Schuldebärg isch nit zum Flohne
Drum seit d'Behörde ohni z'praale:
„D'Verein sölle an die Chöschte zahle.“
Wie die d'Stütz dien zämmechratze
Interessiert uns nit, mir bruche Batze
Ä Prunkbau hän mir euch poschtet
Dä z'benutze, jo das choschtet
Über so Gebühre hän mir euch zwar nie orientiert
Schpielt au kei Rolle, jetzt isch's passiert
Ändwäder wird zahlt, ob chlei oder gross
Suscht stöhn dir alli uf dr Stross.

Mir finde die Gühre sin doch voll drnäbe
Uns Verein goht's jetzt gründlich ans Läbe
Die meischte Kämpfe mit Mitgliederschwund
Sit langem mache mir das kund
Jetzt chunnt dä Gmeinrot hinte dry
Und zieht bi allene Gebühre y
Für d'IG-Mitglieder isch das ä Knall
Ä sone Entscheid bruche mir uf kei Fall

Ä Chartehus zeigt dorum d'Blagggedde
Und dütet a, s'isch zum Verschregge
Wenn mir die Gebühre mien berappe
Duet das Vereins-Chartehus in sich zämmechlappe
Denn isch dr Zapfe ab und denn oh jee
Ä paar Verein wirdsch nümme gseh
Wäge däm Behörde-Entscheid mien si wyche
Und ihri Segel für immer stryche

Und so hoffe mir, das liegt doch uf dr Hand
Die Siebe handle mit gsundem Menscheverstand
Annulieret dä Beschluss, das wär kei Schand
Denn hängt dr Huussäge wieder grad an dr Wand

Mir wänn doch zämme wirgge und zämme läbe
Drum sin die Gebühre voll drnäbe
Mien mir aber lyde unter däne Gebührequal
Zahle mirs zruugg bi dä nächste Wahle.

d'Chrutstorze
Wildviertel-Clique Allschwil